

第二三〇册

明倫彙編

皇極典

帝紀部

109—116
(卷)

古今圖書集成

中華書局影印



古今圖書集成

卷一百一十五

欽定古今圖書集成明倫彙編皇極典

第一百七卷目錄

帝紀部彙考一百一

金一

太祖

太宗

皇極典第一百七卷

帝紀部彙考一百一

金一

太祖本紀

按金史世紀金之先出靺鞨氏靺鞨本號勿吉勿吉古肅慎地也元魏時勿吉有七部曰粟末部曰伯咄部曰安車骨部曰拂涅部曰號室部曰黑水部曰白山部隋稱靺鞨而七部並同唐初有黑水靺鞨粟末靺鞨其五部無聞粟末靺鞨始附高麗姓大氏李勣破高麗粟末靺鞨保東牟山後為渤海稱王傳十餘世有文字禮樂官府制度有五京十五府六十二州黑水靺鞨居肅慎地東瀕海南接高麗亦附於高麗嘗以兵十五萬衆助高麗拒唐太宗敗於安市開元中來朝置黑水府以部長為都督刺史置長史監之賜都督姓李氏名獻誠領黑水經略使其後渤海盛強黑水役屬之朝貢遂絕五代時契丹盡取渤海地而黑水靺鞨附屬於契丹其在南者籍契丹號熟女直其在北者不在契丹籍號生女直生女直地有混

同江長白山混同江亦號黑龍江所謂白山黑水是也金之始祖諱函普初從高麗來年已六十餘矣兄阿古迺好佛留高麗不肯從曰後世子孫必有能相聚者吾不能去也獨與弟保活里俱始祖居完顏部僕幹水之涯保活里居耶懶其後胡十門以曷蘇館歸太祖自言其祖兄弟三人相別而去蓋自謂阿古迺之後石土門迪古乃保活里之裔也及太祖敗遼兵於境上獲耶律謝十乃使梁福幹答刺招諭渤海人曰女直渤海本同一家蓋其初皆勿吉之七部也始祖至完顏部居久之其部人嘗殺他族之人由是兩族交惡閭閻不能解完顏部人謂始祖曰若能為部人解此怨使兩族不相殺部有賢女年六十而未嫁當以相配仍為同部始祖曰諾迺自往諭之曰殺一人而鬪不解損傷益多曷若止誅首亂者一人部內以物納償汝可以無鬪而且獲利焉怨家從之乃為約曰凡有殺傷人者徵其家人口一馬十個犍牛十黃金六兩與所殺傷之家即兩解不得私鬪曰謹如約女直之俗殺人償馬牛三十自此始既備償如約部衆信服之謝以青牛一并許歸六十之婦始祖乃以青牛為聘禮而納之并得其貲產後生二男長曰烏魯次曰幹魯一女曰注思板遂為完顏部人天會十四年追諡景元皇帝廟號始祖皇統四年號其藏曰光陵五年增諡始祖懿憲景元皇帝子德帝諱烏魯天會十四年追諡德皇帝皇統四年號其藏曰熙陵五年增諡淵穆元德皇帝子安帝諱跋海天會十四年追諡安皇帝皇統四年號其藏建陵五年增諡和靖慶安皇帝子獻祖諱綏可黑水舊俗無室廬

負山水坎地梁木其上覆以土夏則出隨水草以居冬則入處其中遷徙不常獻祖乃徙居海古水耕墾樹藝始築室有棟宇之制人呼其地為納葛里納葛里者漢語居室也自此遂定居於安出虎水之側矣天會十四年追諡定昭皇帝廟號獻祖皇統四年號其藏曰輝陵五年增諡憲祖純烈定昭皇帝子昭祖諱石魯剛毅質直生女直無書契無約束不可檢制昭祖欲稍立條教諸父部人皆不悅欲坑殺之已被執叔父謝里忽知部衆將殺昭祖曰吾兄子賢人也必能成家安輯部衆此輩奈何輒欲坑殺之亟往彎弓注矢射於衆中却執者皆散走昭祖乃得免昭祖稍以條教為治部落浸強遂以惕隱官之諸部猶以舊俗不肯用條教昭祖耀武至於青嶺白山順者撫之不從者討伐之入於蘇濱耶懶之地所至克捷還經僕鶻水僕鶻漢語惡瘡也昭祖惡其地名雖已困憊不肯止行至姑里甸得疾迨夜寢於村舍有盜至遂中夜啓行至逼刺紀村止焉是夕卒載柩而行遇賊於路奪柩去部衆追賊與戰復得柩加古部人蒲虎復來襲之垂及蒲虎問諸路人曰石魯柩去此幾何其入曰遠矣追之不及也蒲虎遂止於是乃得歸葬焉生女直之俗至昭祖時稍用條教民頗聽從尚未有文字無官府不知歲月晦朔是以年壽修短莫得而考焉天會十五年追諡成襄皇帝廟號昭祖皇統四年藏號安陵五年增諡昭祖武惠成襄皇帝子景祖諱烏古迺遼太平元年辛酉歲生自始祖至此已六世矣景祖稍役屬諸部自白山耶悔統門耶懶土骨論之屬以至五國之長皆聽命是時遼之邊民

有逃而歸者及遼以兵徙鐵勒烏惹之民鐵勒烏惹多不肯從亦逃而來歸遼使曷魯林牙將兵來索逋逃之民景祖恐遼兵深入盡得山川道路險易或將圖之乃以計止之曰兵若深入諸部必驚擾變生不測逋戶亦不可得非計也曷魯以爲然遂止其軍與曷魯自行索之是時鄰部雖稍從孩懶水烏林答部石顯尚拒阻不從攻之不克景祖以計告於遼主遼主遣使責讓石顯石顯乃遣其子婆諸刊入朝遼主厚賜遣還其後石顯與婆諸刊入見遼主於春蒐遼主乃留石顯於邊地而遣婆諸刊還所部景祖之謀也既而五國蒲聶部節度使拔乙門叛遼路不通遼人將計之先遣同幹來諭旨景祖曰可以計取若用兵彼將走保險阻非歲月可平也遼人從之蓋景祖終畏遼兵之入其境也故自以爲功於是景祖陽與拔乙門爲好而以妻子爲質襲而擒之獻於遼主遼主召見於寢殿燕賜加等以爲生女直部族節度使遼人呼節度使爲太師金人稱都太師者自此始遼主將刻印與之景祖不肯繫遼籍辭曰請俟他日遼主終欲與之遣使來景祖詭使部人揚言曰主公若受印繫籍部人必殺之用是以拒之遼使乃還既爲節度使有官屬紀綱漸立矣生女直舊無鐵鄰國有以甲冑來鬻者傾貲厚賈以與貿易亦令兄弟族人皆售之得鐵既多因之以修弓矢備器械兵勢稍振前後願附者衆幹泯水蒲察部泰神忒保水完顏部統門水溫迪痕部神隱水完顏部皆相繼來附景祖爲人寬恕能容物平生不見喜愠推財與人分食解衣無所吝惜人或忤之亦不念先時有叛去者遣

人諭誘之叛者曰汝主活羅也活羅吾能獲之吾豈能爲活羅屈哉活羅漢語慈烏也北方有之狀如大雞善喙物見牛馬驀馳脊間有瘡喙其脊間食之牛馬輒死若餓不得食雖砂石亦食之景祖嗜酒好色飲啗過人時人呼曰活羅故彼以此訕之亦不以介意其後訕者力屈來降厚賜遣還曷魯懶水有率衆降者錄其歲月姓名即遣去俾復其故人以此益信服之遼咸雍八年五國沒撚部謝野勃董叛遼路不通景祖伐之謝野來禦景祖被重鎧率衆力戰謝野兵敗走拔里邁濛時方十月冰忽解謝野不能軍衆皆潰去乃還師道中遇逋亡要遮險阻晝夜拒戰比至部已憊即往見遼邊將達魯骨自陳敗謝野功行次來流水未見達魯骨疾作而復卒于家年五十四天會十四年追諡惠桓皇帝廟號景祖皇統四年歲號定陵五年增諡景祖英烈惠桓皇帝第二子襲節度使是爲世祖諱劼里鉢生女直之俗生子年長即異居景祖九子元配唐括氏生劼者次世祖次劼孫次肅宗次穆宗及當異居景祖曰劼者柔和可治家務劼里鉢有器量智識何事不成劼孫亦柔善人耳乃命劼者與世祖同居劼孫與肅宗同居景祖卒世祖繼之世祖卒肅宗繼之肅宗卒穆宗繼之穆宗復傳世祖之子至於太祖竟登大位焉世祖遼重熙八年己卯歲生遼咸雍十年襲節度使景祖異母弟跋黑有異志世祖慮其爲變加意事之不使將兵但爲部長跋黑遂誘桓跋散達烏春爲謀罕爲亂及聞諸部使貳於世祖世祖猶欲撫慰之語在跋黑桓跋等傳中世祖嘗買加古部鍛工烏不屯被甲九十烏春

欲託此以爲兵端世祖還其甲語在烏春傳部中有流言曰欲生則附於跋黑欲死則附於劼里鉢頗刺淑世祖聞之疑焉無以察之乃佯爲具裝欲有所往者陰遣人揚言曰寇至部衆聞者莫知虛實有保於跋黑之室者有保於世祖之室者世祖乃盡得兄弟部屬向背彼此之情矣間數年烏春來攻世祖拒之時十月已半大雪累晝夜冰漸覆地烏春不能進既而悔曰此天也乃引兵去烏春舍於阿里矮村澤不乃家而以兵圍其弟勝昆於胡不村兵退勝昆執其兄澤不乃而請殺於世祖且請免其孥戮從之桓跋散達亦舉兵遣肅宗拒之當是時烏春兵在北桓跋兵在南其勢甚盛戒之曰可和則與之和不否則決戰肅宗兵敗會烏春以久雨解去世祖乃以偏師涉舍很水經貼割水覆桓跋散達之家明日大霧晦冥失道至婆多吐水乃覺即還至舍很貼割之間升高阜望之見六騎來大呼馳擊之世祖射一人斃生獲五人問之乃知卜灰撒骨出使助桓跋散達者也世祖至桓跋散達所居焚蕩其室家殺百許人舊將主保亦死之比世祖還與肅宗會肅宗兵又敗矣世祖讓肅宗失利之狀遣人議和桓跋散達曰以爾盈歌之大赤馬辭不失之紫驕馬與我則和二馬皆女直名馬不許桓跋散達大會諸部來攻過裴滿部以其附於世祖也縱火焚之蒲察部沙祇勃董胡補答勃董使阿喜來告難世祖使之詭從以自全曰戰則以旗鼓自別世祖往禦桓跋之衆將行有報者曰跋黑食於愛妾之父家肉脰咽死矣乃遣肅宗求援於遼遂率衆出使辭不失取海姑兄弟兵已而乃知海

姑兄弟貳於桓赦矣欲併取其衆徑至海姑偵者報曰敵已至將戰世祖戒辭不失曰汝先陣於脫豁改原待吾三揚旗三鳴鼓即棄旗決戰死生惟在今日命不足惜使裴滿胡喜率大紫驪馬以爲貳馬馳至陣桓赦散達盛強世祖軍吏未戰而懼皆植立無人色世祖陽陽如平常亦無責讓之言但令士卒解甲少憩以水沃面調羹水飲之有頃訓勵之軍勢復振乃避衆獨引穆宗執其手密與之言曰今日之事若勝則已萬一有不勝吾必無生汝今介馬遙觀勿預戰事若我死汝勿收吾骨勿顧戀親戚亟馳馬奔告汝兄頗刺淑於遼繫籍受印乞師以報此讎語畢祖袖不被甲以縵袍垂欄護前後心輟弓提劍三揚旗三鳴鼓棄旗搏戰身爲軍鋒突入敵陣衆從之辭不失從後奮擊大敗之乘勝逐之自阿不彎至於北隘匈奴死者如仆麻破多吐水水爲之赤棄車甲馬牛軍實盡獲之世祖曰今日之捷非天不能及此亦可以知足矣雖縱之去敗軍之氣沒世不振乃引軍還世祖視其戰地馳突成大路闊且三十隴手殺九人自相重積人皆異之桓赦散達自此不能復聚未幾各以其屬來降遼大安七年也初桓赦兄弟之變不木魯部卜灰蒲察部撒骨出助之至是招之不肯和卜灰之黨石魯遂殺卜灰來降撒骨出追躡亡者道傍人潛射之中口而死自是舊部率歸景祖時幹勒部人孟乃來屬及是有他志會其家失火因以縱火誣歡都世祖徵償如約孟乃不自安遂結烏春窩謀罕舉兵使肅宗與戰敗之獲孟乃世祖獻之於遼臘陪麻產侵掠野居女直略來流水牧馬世祖擊之中四

創久之疾愈臘陪等復略穆宗牧馬交結諸部世祖復伐之臘陪等紿降乃旋臘陪得姑里甸兵百十有七人據暮稜水守險石顯子藻諸刊亦在其中世祖圍而克之盡獲姑里甸兵麻產遁去遂擒臘陪及婆諸刊皆獻之遼既已復請之遼人與之并以前後所獻罪人歸之歡都在破烏春等於斜堆故石拔石皆就擒世祖自將與歡都合兵嶺東諸軍皆至是時烏春已前死窩謀罕請於遼願和解既與和復來襲乃進軍圍之窩謀罕棄城遁去破其城盡俘獲之以功差次分賜諸軍城始破議渠長生殺衆皆長跪遼使者在坐忽一人佩長刀突前咫尺謂世祖曰勿殺我遼使及左右皆走匿世祖色不少動執其人之手語之曰吾不殺汝也於是罰左右匿者曰汝等何敢失次耶罰既已乃徐使執突前者殺之其膽勇鎮物如此師還寢疾遂篤元娶罕懶氏哭不止世祖曰汝勿哭汝惟後我一歲耳肅宗請後事曰汝惟後我三年肅宗出謂人曰吾兄至此亦不與我好言乃叩地而哭俄呼穆宗謂曰烏雅來柔善若辦集契丹事阿骨打能之遼大安八年五月十五日卒襲位十九年五十四明年罕懶氏卒又明年肅宗卒肅宗病篤歎曰我兄真多智哉世祖天性嚴重有智識一見必識暫聞不忘疑寒不縮策動止不同顧每戰未嘗被甲先以夢兆候其勝負嘗乘醉騎驢入室中明日見驢足跡問而知之自是不復飲酒襲位之初內外潰叛締交爲寇世祖乃因敗爲功變弱爲強既破桓赦散達烏春窩謀罕基業自此大矣天會十五年追諡聖肅皇帝廟號世祖皇統四年號其藏曰未陵五年增

諡世祖神武聖肅皇帝母弟頗刺淑襲節度使景祖第四子也是爲肅宗遼重熙十一年壬午歲生在父兄時號國相國相之稱不知始何時初雅達爲國相雅達者桓赦散達之父也景祖以幣馬求之於雅達而命肅宗爲之肅宗自幼機敏善辯當其兄時身居國相盡心匡輔是自叔父賊黑有異志及桓赦散達烏春窩謀罕石顯父子臘陪麻產作難用兵之際肅宗屢當一面尤能知遼人國政人情凡有遼事一切委之肅宗專心焉凡白事於遼官皆令遠跪陳辭譯者轉致之往往爲譯者錯亂肅宗欲得自前委曲言之故先不以實告譯者譯者惑之不得已引之前使自言乃以草木瓦石爲籌枚數其事而陳之官吏聽者皆愕然問其故則爲卑辭以對曰鄙陋無文故如此官吏以爲實然不復疑之是以所訴無不如意桓赦散達之戰部人賽罕死之其弟活羅陰懷忿怨一日忽以劍脊置肅宗項上曰吾兄爲汝輩死矣到汝以償則如之何久之因其兄極至遂怒而攻習不出習不出走避之攻肅宗於家矢注次室之裙著於門扉復攻歡都歡都衷甲拒於室中既不能入持其門旃而去往附益乃益乃誘烏春兵度嶺世祖與遇於蘇素海甸世祖曰予昔有異夢今不可親戰若左軍中有力戰者則大功成矣命肅宗及斜列辭不失與之戰肅宗下馬名呼世祖復自呼其名而言曰若天助我當爲衆部長則今日之事神祇監之語畢再拜遂炷火束縵項之大風自後起火益熾是時八月并青草皆焚之煙焰漲天我軍隨煙衝擊大破之遂獲益乃囚而獻諸遼并獲活羅肅宗釋其罪左右任使

之後竟得其力焉大安八年自國相襲位是時麻產尚據直屋鎧水繕完營堡誘納亡命招之不應遣康宗伐之太祖別軍取麻產家屬鎬釜無遺既獲麻產殺之獻馘於遼陶溫水民來附二年癸酉遣太祖以偏師伐泥龐古部帥水林離海村跋黑播立開平之自是寇賊皆息三年八月肅宗卒天會十五年追諡穆憲皇帝統四年藏號泰陵五年增諡肅宗明睿穆憲皇帝母弟穆宗諱盈歌字烏魯完景祖第五子也南人稱揚割太師又曰揚割追諡孝平皇帝號穆宗又曰揚割號仁祖金代無號仁祖者穆宗諱盈歌諡孝平盈近揚歌近割南北音訛遼人呼節度使爲太師自景祖至太祖皆有是稱凡叢言松漠記張棟金志等書皆無足取穆宗遼重熙二十一年癸巳歲生肅宗時擒麻產遼命穆宗爲詳穩大安十年甲戌襲節度使年四十二以兄劾者子撒改爲國相三年丙子唐括部跋葛勃堇與溫都部人跋忒有舊跋葛以事往跋忒殺跋葛使太祖率師伐跋忒跋忒亡去追及殺之星顯水紇石烈部阿疎毛賄祿阻兵爲難穆宗自將伐阿疎撒改以偏師攻鈍恩城拔之阿疎初聞來伐乃自訴於遼遂留劾者守阿疎城穆宗乃還會陶溫水徒籠古水紇石烈部阿闊版及石魯阻五國鷹路執殺遼捕鷹使者遼詔穆宗討之阿闊版等據險立柵方大寒乃募善射者操勁弓利矢攻之數日入其城出遼使存者數人俾之歸統門渾蠢水之交烏古論部留可詐都與蘇濱水烏古論敵庫德起兵於米里迷石罕城納根涅之子鈍恩亦亡去於是兩黨作難八月撒改爲都統辭不失阿里合懣幹

帶副之以伐留可詐都塢塔等設都訶石土門伐敵庫德撒改欲先平邊地城堡或欲先取留可莫能決乃命太祖往鈍恩將援留可乘設都訶兵未集而攻之石土門軍既與設都訶會迎擊鈍恩大敗之降米里迷石罕城獲鈍恩敵庫德釋弗殺太祖度盆嶺嶺與撒改會攻破留可城留可已先往遼矣盡殺其城中渠長還圍塢塔城塢塔先已亡在外城降於軍詐都亦降於蒲家奴於是撫寧諸路如舊時太祖因致穆宗教統門渾蠢耶悔星顯四路及嶺東諸部自今勿復稱都部長命勝管醜阿等撫定乙離骨嶺注阿門水之西諸部居民又命幹帶及偏裨悉平二涅囊虎二蠡出等路寇盜而還七年庚辰劾者尚守阿疎城毛賄祿來降阿疎猶在遼遼使使來罷兵未至穆宗使烏林苔石魯往佐劾者戒之曰遼使來罷兵但換我軍衣服旗幟與阿疎城中無辨勿令遼使知之因戒劬者曰遼使可以計却勿聽其言遼罷兵也遼使果來罷兵穆宗使蒲察部胡魯勃堇遼遜字堇與俱至阿疎城劬者見遼使詭謂胡魯勃堇遼遜曰我部族自相攻擊干汝等何事誰識汝之太師乃援劍刺殺胡魯勃堇遜所乘馬遼使驚駭遼走不敢回顧徑歸居數日破其城狄故保還自遼在城中執而殺之阿疎復訴於遼遼遣奚節度使乙烈來穆宗至來流水興和村見乙烈問阿疎城事命穆宗曰凡攻城所獲存者復與之不存者備償且徵馬數百匹穆宗與遼佐謀曰若償阿疎則諸部不復可號令任使也乃令主隈亮苔兩水之民陽爲阻絕鷹路復使鼉故德部節度使言於遼曰欲開鷹路非生女直節度使不可遼

不知其爲穆宗謀也信之命穆宗討阻絕鷹路者而阿疎城事遂止穆宗聲言平鷹路敗於土溫水而歸是歲留可來降八年辛巳遼使使特賜物來賞平鷹路之有功者九年壬午使蒲家奴以遼賜給主隈亮苔之民且修鷹路而歸冬蕭海里叛入於係案女直阿典部遣其族人幹達刺來結和曰願與太師爲友同往伐遼穆宗執幹達刺會遼命穆宗捕討海里穆宗送幹達刺於遼募軍得甲千餘女直甲兵之數始見於此蓋未嘗滿千也軍次混同水蕭海里再使人來復執之既而與海里遇海里遙問曰我使者安在對曰與後人偕來海里不信是時遼追海里兵數千人攻之不能克穆宗謂遼將曰退爾軍我當獨取海里遼將許之太祖策馬突戰流失入海里首海里墜馬下執而殺之大破其軍使阿萬合懣獻馘於遼金人自此知遼兵之易與也是役也康宗最先登於是以前登并有功者爲前行次以諸軍護俘獲歸所部穆宗朝遼主於漁所大被嘉賞授以使相錫子加等十年癸未二月穆宗還遼使使授從破海里者官賞高麗始來通好十月二十九日穆宗卒年五十有一初諸部各有信牌穆宗用太祖議擅置牌號者真於法自是號令乃一民聽不疑矣自景祖以來兩世四主志業相因卒定離析一切治以本部法令東南至於乙離骨曷懶耶懶土骨論東北至於五國主隈亮苔金蓋盛於此天會十五年追諡孝平皇帝廟號穆宗皇統四年號其藏曰獻陵五年增諡章順孝平皇帝兄子康宗諱烏雅速字毛路完世祖長子也遼清寧七年辛丑歲生乾統五年癸未襲節度使年四十

三穆宗末年阿疎使達紀誘扇邊民曷懶甸人執送之穆宗使石適歡撫納曷懶甸未行穆宗卒至是遣焉先是高麗通好既而頗有隙高麗使來請議事使者至高麗拒而不納五水之民附於高麗執團練使十四人語在高麗傳中二年甲申高麗再來伐石適歡再破之高麗復請和前所執團練十四人皆遣歸石適歡撫定邊民而還蘇濱水民不聽命使幹帶等至活羅海川召諸官僚告諭之合國部蘇濱水居幹帶勃堇不至幹帶部職德部既至復亡去塢塔遇二部於馬紀嶺執之而來遂伐幹帶克之幹帶進至北琴海攻拔泓貳城乃還四年丙戌高麗遣黑歡方石來賀襲位遣孟魯報之高麗約還諸亡在彼者乃使阿貽勝昆往受之高麗背約殺二使築九城於曷懶甸以兵數萬來攻幹帶敗之幹帶亦築九城與高麗九城相對高麗復來攻幹帶復敗之高麗約以還通逃之人退九城之軍復所侵故地九月乃罷兵七年己丑歲不登滅盜賊徵償振貧乏者十一年癸酉康宗卒年五十二天會十五年追諡恭簡皇帝皇統四年號其藏曰喬陵五年增諡康宗獻敬恭簡皇帝按太祖本紀太祖應乾興運昭德定功仁明莊孝大聖武元皇帝諱晏本諱阿骨打世祖第二子也母曰翼簡皇后拏懶氏遼道宗時有五邑雲氣屢出東方大若二千斛困倉之狀司天孔致和竊謂人曰其下當生異人建非常之事天以象告非人力所能爲也咸雍四年戊申七月一日太祖生幼時與羣兒戲力兼數輩舉止端重世祖允愛之世祖與獵酷麻產戰於野鵲水世祖被四創疾困坐太祖於膝循其髮而

撫之曰此兒長大吾復何憂十歲好弓矢甫成童即善射一日遼使坐府中顧見太祖手持弓矢使射羣鳥連三發皆中遼使矍然曰奇男子也太祖嘗宴紇石烈部活離罕家散步門外南望高阜使衆射之皆不能至太祖一發過之度所至踰三百二十步宗室盡都詞最善射遠其不及者猶百步也天德三年立射碑以識焉世祖伐十灰太祖因辭不失請從行世祖不許而心異之烏春既死窩謀罕請和既請和復來攻遂圍其城太祖年二十三被短甲免胄不介馬行圍號令諸軍城中望而識之壯士太峪乘駿馬持槍出城馳刺太祖太祖不及備舅氏活臘胡馳出其間擊太峪槍折刺中其馬太峪僅得免嘗與沙忽帶出營殺略不令世祖知之且還敵以重兵追之獨行隘巷中失道追者益急值高岸與人等馬一躍而過追者乃還世祖寢疾太祖以事知遼統軍司將行世祖戒之曰汝速了此事五月未半而歸則我猶及見汝也太祖往見曷魯驛古統軍既畢事前世祖沒一日還至家世祖見太祖來所請事皆如志喜甚執太祖手抱其頸而撫之謂穆宗曰烏雅東柔善惟此子足了契丹事穆宗亦雅重太祖出入必俱太祖遠出而歸穆宗必親逐之世祖已擒臘酷麻產尚據直屋鎧水肅宗使太祖先取麻產家屬康宗至直屋鎧水圍之太祖會軍親獲麻產獻馘於遼遼命太祖爲詳穩仍命穆宗辭不失歡都皆爲詳穩久之以偏師伐泥龐古部跋黑播立開等乃以達塗阿爲鄉導沿帥水夜行襲之擄其妻子初溫都部跋忒殺唐括部跋葛穆宗命太祖伐之太祖入辭謂穆宗曰昨夕見亦

詳此行必克敵遂行是歲大雪寒甚與烏古論部兵沿土溫水過末鄰鄉追及跋忒於阿斯溫山北深之間殺之軍還穆宗親逐太祖於雷建村撒改以都統伐留可設都詞合石土門伐敵庫德撒改與將佐議或欲先平邊地部落城堡或欲徑攻留可城議不能決顯得太祖至軍中穆宗使太祖往曰事必有可疑軍之未發者止有甲士七十盡以畀汝設都詞在米里迷石罕城下石土門未到土人欲執設都詞以與敵使來告急遇太祖於斜堆甸太祖曰國兵盡在此矣使敵先得志於設都詞後雖種誅之何益也乃分甲士四十與之太祖以三十人詣撒改軍道遇人曰敵已據盆嶺嶺南路矣衆欲由沙偏嶺往太祖曰汝等畏敵耶既度盆嶺嶺不見敵已而聞敵乃守沙偏嶺以拒我及至撒改軍夜急攻之運明破其衆是時留可塢塔皆在遼既破留可還攻塢塔塔城城中人以城降初太祖過盆嶺嶺經塢塔城下從騎有後者塢塔城人攻而奪之釜太祖駐馬呼謂之曰毋取我炊食器其人謾言曰公能來此何憂不得食太祖以鞭指之曰吾破留可即於汝乎取之至是其人持釜而前曰奴輩誰敢毀詳穩之器也遣蒲家奴招詐都詐都乃降釋之穆宗將伐蕭海里募兵得千餘人女直兵未嘗滿千至是太祖勇氣自倍曰有此甲兵何事不可圖也海里來戰與遼兵合因止遼人自爲戰勃海留守以甲贈太祖太祖亦不受穆宗問何爲不受曰被彼甲而戰戰勝則是因彼成功也穆宗末年令諸部不得擅真信牌馳驛訊事號令自此始一皆自太祖啓之康宗七年歲不登民多流羣強者轉而爲

盜歡都等欲重其法爲盜者皆殺之太祖曰以賊殺人不可財者人所致也遂減盜賊徵償法爲徵三倍民間多通負賣妻子不能償康宗與官屬會議太祖在外庭以帛繫杖端麾其衆令曰今貧者不能自活賣妻子以償債骨肉之愛人心所同自今三年勿徵過三年徐圖之衆皆聽令聞者感泣自是遠近歸心焉歲癸巳十月康宗夢逐狼屢發不能中太祖前射中之旦日以所夢問僚佐衆曰吉兄不能得而弟得之兆也是歲康宗即世太祖襲位爲都勃極烈遣使阿息保來曰何以不告喪太祖曰有喪不能弔而乃以爲罪乎他日阿息保復來徑騎至康宗殯所閱贈馬欲取之太祖怒將殺之宗雄諫而止既而遼命久不至遼主好畋獵淫酗急於政事四方奏事往往不見省紇石烈阿疎既奔遼穆宗取其城及其部衆不能歸遂與族弟銀木可辭里罕陰結南江居人渾都僕速欲與俱亡入高麗事覺太祖使夾古撒喝捕之而銀木可辭里罕先爲遼戍所獲渾都僕速已亡去撒喝取其妻子而還二年甲午六月太祖至江西遣使使來致襲節度之命初遼每歲遣使市名鷹海東青於海上道出境內使者貪縱徵索無藝公私厭苦之康宗嘗以不遣阿疎爲言稍拒其使者太祖嗣節度亦遣蒲家奴往索阿疎故嘗以此二者爲言終至於滅遼然後已至是復遣宗室習古迺完顏銀木可往索阿疎習古迺等還具言遼主驕肆廢弛之狀於是召官僚耆舊以伐遼告之使備衝要建城堡修戎器以聽後命遼統軍司聞之使節度使捏哥來問狀曰汝等有異志乎修戰具飭守備將以誰禦太祖

答之曰設險自守又何問哉遼復遣阿息保來詰之太祖謂之曰我小國也事大國不敢廢禮大國德澤不施而逋逃是主以此字小能無望乎若以阿疎與我請事朝貢苟不獲已豈能束手受制也阿息保還遼人始爲備命都軍蕭撻不野調諸軍於寧江州太祖聞之使僕聒刺復索阿疎實觀其形勢僕聒刺還言遼兵多不知其數太祖曰彼初調兵豈能遽集如此復遣胡沙保往還言惟四院統軍司與寧江州軍及渤海八百人耳太祖曰果如吾言謂諸將佐曰遼人知我將舉兵集諸路軍備我必先發制之無爲人制衆皆曰善乃入見宣靖皇后告以伐遼事後曰汝嗣父兄立邦家見可則行吾老矣毋貽我憂汝必不至是也太祖感泣奉觴爲壽即奉后率諸將出門舉觴東向以遼人荒肆不歸阿疎并己用兵之意禱於皇天后土酬畢后命太祖正坐與僚屬會酒號令諸部使婆盧火徵移懶路迪古乃兵幹魯古阿魯撫諭幹忽急賽兩路係遼籍女直實不迭往完賂路執遼障驛官達魯古部副使解列寧江州渤海大家奴於是達魯古部實里館來告曰聞舉兵伐遼我部誰從太祖曰吾兵雖少舊國也與汝鄰境固當從我若畏遼人自往就之九月太祖進軍寧江州次寥晦城婆盧火徵兵後期杖之復遣督軍諸路兵皆會於來流水得二千五百人致遼之罪申告於天地曰世事遼國恪修職貢定烏春窩謀罕之亂破蕭海里之衆有功不省而使侮是加罪人阿疎屢請不遣今將問罪於遼天地其鑒佑之遂命諸將傳檄而誓曰汝等同心盡力有功者奴婢部曲爲良庶人官之先有官

者敘進輕重祇功苟違誓言身死挺下家屬無赦師次唐括帶幹甲之地諸軍禳射介而立有光如烈火起於人足及戈矛之上人以爲兵祥明日次扎只水光見如初將至遼界先使宗幹督士卒夷塹既度遇渤海軍攻我左翼七謀克衆少却敵兵直犯中軍斜也出戰哲垵先驅太祖曰戰不可易也遣宗幹止之宗幹馳出斜也前控止哲垵馬斜也遂與俱還敵入從之耶律謝十墜馬遼人前救太祖射救者斃并射謝十中之有騎突前又射之徹扎洞臂謝十拔箭走追射之中其背飲矢之半債而死獲所乘馬宗幹與數騎陷遼軍中太祖救之免胄戰或自傍射之矢拂於額太祖顧見射者一矢而斃謂將士曰盡敵乃止衆從之勇氣自倍敵大奔相蹂踐死者十七八撒改在別路不及會戰使人以戰勝告之而以謝十馬賜之撒改使其子宗翰完顏希尹來賀且稱帝因勸進太祖曰一戰而勝遂稱大號何示人淺也進軍寧江州諸軍填塹攻城寧江人自東門出溫迪痕痕阿徒罕邀擊盡殲之十月朔克其城獲防禦使大藥師奴陰縱之使招諭遼人鐵驪部來送款次來流城以俘獲賜將士召渤海梁福幹答刺使之僞亡去招諭其鄉人曰女直渤海本同一家我與師伐罪不濫及無辜也使完顏婁室招諭係遼籍女直師還謁宣靖皇后以所獲頒宗室耆老以實里館貴產給將士初命諸路以三百戶爲謀克十謀克爲猛安酬幹等撫定議謀水女直龍古酋長胡蘇魯以城降十一月遼都統蕭乂里副都統撻不野將步騎十萬會於鴨子河北太祖自將擊之未至鴨子河旣夜太祖方就枕若有

扶其首者三瘡而起曰神明警我也即鳴鼓舉燧而行黎明及河遼兵方壞陵道選壯士十輩擊走之大軍繼進遂登岸甲士三千七百至者纔三之一俄與敵遇於出河店會大風起塵埃蔽天乘風勢擊之遼兵潰逐至幹論濛殺獲首齒及車馬甲兵珍玩不可勝計徧賜官屬將士燕犒彌日遼人嘗言女直兵若滿萬則不可敵至是始滿萬云幹魯敗遼兵斬其節度使撻不野僕廕等攻賓州拔之兀惹雞鵠室來降遼將赤狗兒戰於賓州僕廕渾黜敗之鐵驪王回离保以所部降吾睹補蒲察復敗赤狗兒蕭乙薛軍於祥州東幹忽急塞兩路降幹魯古敗遼軍於咸州西斬統軍婁實於陣完顏婁室克咸州是月吳乞買撒改辭不失率官屬諸將勸進願以新歲元日恭上尊號太祖不許阿离合懣蒲家奴宗幹等進曰今大功已建若不稱號無以繫天下心太祖曰吾將思之

收國元年正月壬申朔羣臣奉上尊號是日即皇帝位上曰遼以寶鐵為號取其堅也寶鐵雖堅終亦變壞惟金不變不壞金之色白完顏部色尚白於是國號大金改元收國丙子自上將攻黃龍府進臨益州州人走保黃龍取其餘民以歸遼遣都統耶律訛里朵左副統蕭乙薛右副統耶律張奴都監蕭謝佛留騎二十萬步卒七萬戍邊留婁室銀木可守黃龍上率兵趨達魯古城次寧江州西遼使僧家奴來議和國書斥上名且使為屬國庚子進師有火光正圓自空而墜上曰此祥徵殆天助也酬白水而拜將士莫不喜躍進逼達魯古城上登高望遼兵若連雲灌木狀顧謂左右曰遼兵心貳而情怯雖多不足畏遂趨

高阜為陣宗雄以右翼先馳遼左軍左軍却左翼出其陣後遼右軍皆力戰婁室銀木可衝其中堅凡九陷陣皆力戰而出宗翰請以中軍助之上使宗幹往為疑兵宗雄已得利擊遼右軍遼兵遂敗乘勝追躡至其營會日已暮圍之黎明遼軍潰圍出逐北至阿婁岡遼步卒盡殫得其耕具數千以給諸軍是役也遼人本欲屯田且戰且守故併其耕具獲之二月師還三月辛未朔獵於寥晦城四月遼耶律張奴以國書來上以書辭慢侮留其五人獨遣張奴回報書亦如之五月庚午朔避暑於近郊甲戌拜天射柳故事五月五日七月十五日九月九日拜天射柳歲以為常六月己亥朔遼耶律張奴復以國書來猶斥上名上亦斥遼主名以復之且論之使降七月戊辰以弟吳乞買為諸班勃極烈國相撤改為國論勃極烈辭不失為阿買勃極烈弟斜也為國論勃極烈甲戌遼使辭刺以書來留之不遣九百奚營來降八月戊戌上親征黃龍府次混同江無舟上使一人道前乘赭白馬徑涉曰視吾鞭所指而行諸軍隨之水及馬腹後使舟人測其渡處深不得其底熙宗天眷二年以黃龍府為濟州軍日利涉蓋以太祖涉濟故也九月克黃龍府遣辭刺還遼班師至江徑渡如前丁丑至自黃龍府己卯黃龍見空中癸巳以國論勃極烈撤改為國論忽魯勃極烈阿离合懣為國論乙室勃極烈十一月遼主聞取黃龍府大懼自將七十萬至駝門駝馬蕭特末林牙蕭查刺等將騎五萬步四十萬至幹鄰濛上自將禦之十二月己亥行次爻刺會諸將議皆曰遼兵號七十萬其鋒未易當吾軍遠來人

馬疲之宜駐於此深溝高壘以待上從之遣迪古邁銀木可鎮達魯古丁未上以騎兵親候遼軍獲督餉者知遼主以張奴叛西還二日矣是日上還至熟結濛有光見於矛端戊申諸將曰今遼主既還可乘怠追擊之上曰敵來不迎戰去而追之欲以此為勇耶衆皆悚愧願自効上復曰誠欲追敵約齋以往無事餽饋若被敵何求不得衆皆奮躍追及遼主於護步答岡是役也兵止二萬上曰彼衆我寡兵不可分視其中軍最堅遼主必在焉敗其中軍可以得志使右翼先戰兵數交左翼合而攻之遼兵大潰我師馳之橫出其中遼師敗績死者相屬百餘里獲輿輦帝帳兵械軍資他寶物馬牛不可勝計是戰斜也援矛殺數十人阿离本被圍溫迪罕迪忽迭以四謀克兵出之完顏蒙剗身被數創力戰不已功皆論最蕭特末等焚營遁去遂班師夾谷撒喝取開州婆盧火下特鄰城辭里罕降

二年正月戊子詔曰自破遼兵四方來降者衆宜加優恤自今契丹奚漢渤海係遼籍女直韋室達魯古元惹鐵驪諸部官民已降或為軍所俘獲逃遁而還者勿以為罪其酋長仍官之且使從宜居處閏月高未昌據東京使撻不野來求援高麗遣使來賀捷且求保州詔許自取之二月己巳詔曰比以歲凶庶民艱食多依附豪族因為奴隸及有犯法徵償莫辦折身為奴者或私約立限以人對贖過期則為奴者並聽以兩人贖一為良若原約以一人贖者即從元約四月乙丑以幹魯統內外諸軍與蒲察迪古乃會咸州路都統幹魯古討高未昌胡沙補等被害五月幹

魯等敗未昌撻不野擒未昌以獻戮之於軍東京州縣及南路係遼女直皆降詔除遼法省稅賦置猛安謀克一如本朝之制以幹魯爲南路都統迭勃極烈阿徒罕破遼兵六萬於照散城九月己亥上獵近郊乙巳南路都統幹魯來見於婆盧買水始置金牌十二月庚申朔詣班勃極烈吳乞買及羣臣上尊號曰大聖皇帝改明年爲天輔元年

天輔元年正月開州叛加古撒喝等討平之國論吳勃極烈斜也以兵一萬取泰州四月遼秦晉國王耶律捏里來伐迪古乃婁室婆盧火將兵二萬會咸州路都統幹魯古擊之五月丁巳詔自收寧江州已後同姓爲婚者杖而離之七月戊申以完顏輪知東京事八月癸亥高麗遣使來請保州十二月甲子幹魯古等敗耶律捏里兵於燕黎山拔顯州乾懿豪徽成川惠等州皆降是月宋使登州防禦使馬政以國書來其略曰日出之分實生聖人竊聞征遼屢破勍敵若克遼之後五代時陷入契丹漢地願界下邑二年正月庚寅遼雙州節度使張崇降使散視如宋報聘書曰所請之地今當與宋夾攻得者有之二月癸丑朔遣使耶律奴哥等來議和辛酉李重迪古乃婁室來見上以遼主近在中京而敢輒來皆杖之効里保雙古等言咸州都統幹魯古知遼主在中京而不請討芻糧豐足而不以實聞攻顯州時所獲生口財畜多自取二月癸未朔命開哥代爲都統而鞠治之幹魯古坐降謀克壬辰遼使耶律奴哥以國書來庚子以婁室言黃龍府地僻且遠宜重戍守乃命合諸路謀克以婁室爲萬戶鎮之四月辛巳遼使以國

書來五月丙申命胡突哀如遼六月甲寅詔有司禁民凌虐典雇良人及倍取贖直者甲戌遼通祺雙遼等州八百餘戶來歸命分置諸部擇膏腴之地處之七月癸未詔曰匹里水路先顏木里古渤海大家奴等六謀克貧乏之民昔嘗給以官糧置之漁獵之地今曆日已久不知登耗可具其數以聞胡突哀還自遼耶律奴哥復以國書來丙申胡突哀如遼遼戶二百來歸處之泰州詔遣阿里骨李家奴特里底招諭未降者仍詔達魯古部勃董辭列凡降附新民善爲存撫來者各令從便安居給以官糧毋輒動擾八月胡突哀還自遼耶律奴哥突迭復以國書來九月戊子詔曰國書詔合宜選善屬文者爲之其令所在訪求博學雄才之士敦遣赴闕閏月庚戌朔以降將霍石韓慶和爲千戶九百奚部蕭寶乙辛北部訛里野漢人王六兒王伯龍契丹特末高從祐等各率衆來降遼耶律奴哥以國書來十月癸未以龍化州降者張應古劉仲良爲千戶乙未咸州都統司言漢人李孝功渤海二哥率衆來降命各以所部爲千戶十二月甲辰遣李重木字以定遼地論高麗耶律奴哥以國書來遼懿州節度使劉宏以戶三千并執遼候人來降以爲千戶川州寇二萬已降復叛紇石烈照里擊破之

三年正月甲寅東京人爲質者未吉等五人結衆叛事覺誅其首惡餘皆杖百沒入在行家屬資產之半詔知東京事幹論繼有犯者並如之丙辰詔龍古李董酬幹曰胡魯古迭八合二部來送款若等先時不無交惡自今毋相侵擾三月耶律奴哥以國書來四月丙子朔日有食之五月壬戌詔咸州路都統司曰兵與以前曷蘇館回伯里與係遼籍不係遼籍女直戶民有犯罪流竄邊境或亡入於遼者本皆吾民遠在異境朕甚憫之今既議和當行理索可明諭諸路千戶謀克徧與詢訪其官稱名氏地里具錄以上六月辛卯遼遣太傅習泥烈等奉冊璽來上摺冊文不合者數事復之散觀還自宋宋使馬政及其子宏來聘散觀受宋團練使上怒杖而奪之宋使還復遣李董辭列曷魯等如宋七月辛亥遼人楊詢卿羅子韋各率衆來降命各以所部爲謀克八月己丑頒女直字九月以遼冊禮使失期詔諸路軍過江屯駐十一月習泥烈等復以國書來曷懶甸長城高麗增築三尺詔胡刺古習顯慎固營壘

四年二月辭列曷魯還自宋宋使趙良嗣王暉來議燕京西京地三月甲辰上謂羣臣曰遼人屢敗遣使求成惟飾虛辭以爲緩師之計當議進討其令咸州路統軍司治軍旅修器械具數以聞辛酉詔咸州路都統司曰朕以遼國和議無成將以四月二十五日進師令斜葛留兵一千鎮守闕母以餘兵來會於渾河遼習泥烈以國書來四月乙未上自將伐遼以遼使習泥烈宋使趙良嗣等從行五月甲辰次渾河西使宗雄先趨上京遣降者馬乙持詔諭城中壬子至上京詔官民曰遼主失道上下同怨朕興兵以來所過城邑負固不服者即攻拔之降者撫恤之汝等必聞之矣今爾國和好之事反覆見欺朕不欲天下生靈久罹塗炭遂決策進討比遣宗雄等相繼招諭尚不聽從今若攻之則城破矣重以弔伐之義不欲殘

民故開示明詔諭以禍福其審圖之上京人恃禦備儲蓄爲固守計甲寅亟命進攻上謂習泥烈趙良嗣等曰汝可觀吾用兵以上去就上親臨城督將士諸軍鼓譟而進自旦及已闇母以麾下先登克其外城留守撻不野以城降趙良嗣等奉觴爲壽皆稱萬歲是日赦上京官民詔諭遼副統余親王戊戌沃黑河宗幹率羣臣諫曰地遠時暑軍馬罷乏若深入敵境糧饋之絕恐有後艱上從之乃班師命分兵攻慶州余親襲闡母於遼河完顏背答烏塔等戰却之完顏特虎死焉七月癸卯上至自伐遼九月燭隈水部實里古達等殺字董酬幹僕忽得以叛十月戊辰朔日有食之戊寅命幹魯分胡刺古烏春之兵以討實里古達十一月東京留守司乞本京官民質子增數番代上不許曰諸質子已各受田廬若復番代則往來動搖可並仍舊十二月宋復使馬政來請西京之地五年春正月幹魯敗實里古達于合撻刺山誅首惡四人餘悉撫定二月遣昱及宗雄分諸路猛安謀克之民萬戶屯泰州以養盧火統之賜耕牛五十四月乙丑朔宗翰請伐遼詔諸路預戒軍事五月遼都統耶律余覲等詣咸州降閏月辛巳國論胡魯勃極烈撒改薨六月癸巳余覲與其將來見丙申千戶胡離答坐擅署部人爲蒲里衍杖一百罷之庚子詔諸班勃極烈吳乞買貳國政以吳勃極烈斜也爲忽魯勃極烈蒲家奴爲吳勃極烈宗翰爲移賚勃極烈七月庚辰詔咸州都統司曰自余覲來灼見遼國事宜已決議親往其治軍以俟師期尋以連雨罷親征命吳勃極烈昱爲都統移賚勃極烈宗翰副之帥師而

西十一月辛丑以忽魯勃極烈杲爲內外諸軍都統以昱宗翰宗幹宗望宗盤等副之甲辰詔曰遼政不綱人神共棄今欲中外一統故命汝率大軍以行討伐爾其慎重兵事擇用善謀賞罰必行糧餉必繼勿擾降服勿縱俘掠見可而進無淹師期事有從權母須申稟戊申詔曰若克中京所得禮樂儀仗圖書文籍並先次津發赴闕

六年正月癸酉都統杲克高恩回紇三城乙亥取中京遂下澤州二月庚寅朔日有食之己亥宗翰等敗遼奚王霞末於北安州降奚都西節度使訛里刺以本部降王寅都統杲遣使來奏捷并獻所獲寶貨詔曰汝等提兵於外克副所任攻下城邑撫安人民朕甚嘉之所言分遣將士招降山前諸部計悉已撫定續遣來報山後若未可往即營田牧馬俟及秋成乃圖大舉更當熟議見可則行如欲益兵具數來上不可恃一戰之勝輒有弛慢新降附者當善撫存宣諭將士使知朕意宗翰駐北安遣希尹等略地獲遼護衛耶律習泥烈知遼主獵駕驚澤以其子晉王賢而有人望惡而殺之衆益離心雖有西北西南兩路兵馬皆羸弱遂遣耨溫都等報都統杲進兵襲之三月都統杲出青嶺宗翰出孤憤追遼主於鴛鴦澤遼主奔西京宗翰復追至白水澤不及獲其貨寶己巳至西京壬申西京降希尹追遼主於乙室部不及乙亥西京復叛是月遼秦晉國王耶律捏里即位於燕四月辛卯復取西京壬辰遣徒單吳甲高慶裔於宋戊戌都統杲自西京趨白水澤吳勃極烈昱襲毗室部於鐵呂川爲敵所敗還會察刺兵追至黃水北大

破之耶律坦招徠西南諸部西至夏其招討使耶律佛頂降金肅西平二郡漢軍四千餘人叛去耶律坦等襲取之闡母婁室招降天德雲內寧邊東勝等州獲阿疎而還是時山西城邑諸部雖降人心未固遼主保陰山耶律捏里在燕京都統杲遣宗望入奏請上臨軍五月辛酉宗望來奏捷百官入賀賜宴歡甚先是獲遼樞密使得里底節度使和尚雅里斯余里野等都統杲使阿鄰護送赴闕得里底道亡阿鄰坐誅耶律捏里遣使請罷兵戊寅使楊勉以書諭捏里使之降謀葛失遣其子蒞泥刮失貢方物六月戊子朔上親征遼發自上京諸班勃極烈吳乞買監國辛亥詔諭上京官民曰朕順天弔伐已定三京但以遼主未獲兵不能已今者親征欲由上京路進恐撫定新民驚疑失業已出自駕密呂其先降後叛逃入險阻者諸後出首悉免其罪若猶拒命擊戮無赦是月耶律捏里卒幹魯婁室敗夏人於野谷七月甲子詔諸將毋得遠迎以廢軍務乙丑上京漢人毛八十率二千餘戶降因命領之丙寅以幹答刺招降者衆命領八千戶以忽薛副之壬午希尹以阿疎見杖而釋之八月己丑次鴛鴦澤都統杲率官屬來見癸巳上追遼主於大魚澤昱宗望追及遼主於石董鐸與戰敗之遼主遁己亥次居延北辛丑中京將完顏渾黜敗契丹奚漢六萬於高州宇董麻吉死之得里得滿部降昱宗望追遼主於烏里質鐸不及九月庚申次草澤闡母平中京部族之先叛者及招撫沿海郡縣節度使耶律慎思領諸部入內地乙丑詔六部奚曰汝等既降復叛扇誘衆心罪在不赦尚以歸附日淺

恐緩懷之道有所未孚故復令招諭若能速降當釋其罪官皆仍舊歸化州降戊辰次歸化州甲戌宗雄薨丁丑奉聖州降十月丙戌朔次奉聖州詔曰朕屢勅將臣安輯懷附無或侵擾然愚民無知向多逃匿山林即欲加兵深所不忍今其逃散人民罪無輕重咸與矜免有能率衆歸附者授之世官或奴婢先其主降並釋爲良其布告之使諭朕意蔚州降庚寅余親等遣蔚州降臣翟昭彥徐興田慶來見命昭彥慶皆爲刺史與爲團練使詔曰比以幽薊一方招之不服今欲帥師以往故先安撫山西諸部汝等既已懷服宜加撫存官民未附已前罪無輕重及係官連負皆與釋免諸官各遷敘之丁酉蔚州翟昭彥田慶殺知州事蕭觀寧等以叛丙午復降十一月詔諭燕京官民王師所至降者赦其罪官皆仍舊十二月上伐燕京宗望率兵七千先之迪古乃出得勝口銀木哥出居庸關婁室爲左翼婆盧火爲右翼取居庸關丁亥次媽州戊子次居庸關庚寅遼統軍都監高大等來送款上至燕京入自南門使銀木哥婁室陳于城上乃次於城南遼知樞密院左企弓虞仲文樞密使曹勇義副使張彥忠參知政事康公弼僉書劉彥宗奉表降辛卯遼百官詣軍門叩頭請罪詔一切釋之壬辰上御德勝殿羣臣稱賀甲午命左企弓等撫定燕京諸州縣詔西京官吏曰乃者師至燕都已皆撫定唯蕭妃與官屬數人遁去已發兵追襲或至彼路可執以來黃龍府叛宗輔討平之

七年正月丁巳遼奚王回离保僭稱帝甲子遼平州節度使時立愛降詔曲赦平州又詔諸班勃極烈曰比遣昂徙諸部民人於嶺東而昂恃戾騷動煩擾致多怨叛其違命失衆當重典若或有疑禁錮以待庚午詔中京都統幹論曰聞卿撫定人民各安其業朕甚嘉之回离保聚徒逆命汝宜計畫無使滋蔓王申詔招諭回离保等以時立愛言招撫諸部已卯宋使來議燕京西京地庚辰宜錦乾顯成川豪懿等州皆降甲申詔曰諸州部族歸附日淺民心未寧今農事將興可遣分諭典兵之官無縱軍士動擾人民以廢農業二月乙酉朔命撤入詔諭與中府降之遼來州節度使田顯儒州刺史杜師回遷州刺史高永福潤州刺史張成皆降壬辰詔諸班勃極烈曰郡縣今皆撫定有逃散未降者已釋其罪更宜招諭之前後起遷戶民去鄉未久豈無懷土之心可令所在有司深加存恤毋輒有騷動衣食不足者官賑貸之癸巳詔曰頃因兵事未息諸路關津絕其往來今天下一家若仍禁之非所以便民也自今顯成東京等路往來聽從其便其間被擄及鬻身者並許自贖爲良仍令馳驛布告與中宜州復叛宋使趙良嗣來請加歲幣以代燕稅及議畫疆與遣使賀正且生辰置榷場交易并計議西京等事癸卯銀木哥鐸刺如宋乙巳詔都統果曰新附之民有材能者可錄用之戊申詔平州官與宋使同分割所與燕京六州之地癸丑大赦是月改平州爲南京以張覺爲留守三月甲寅朔將誅昂以習不失諫杖之七十仍拘泰州戊午都統果等言耶律麻哲余親吳十鐸刺等謀反宜早圖之上召余親從容謂之曰朕得天下皆我君臣同心同德以成大功固非汝等之力今聞汝等謀叛若誠

然耶必須鞍馬甲冑器械之屬當悉付汝朕不食言若再爲我擒無望免死欲留事朕無懷異志吾不汝疑余親皆戰慄不能對命杖鐸刺七十餘並釋之宋使盧益趙良嗣馬宏以國書來四月丁亥遣幹魯宗望襲遼主於陰山壬辰復書於宋師初入燕遼兵復犯奉聖州林牙大石壁龍門東二十五里都統幹魯聞之遣照立婁室馬和尚等率兵討之生獲大石悉降其衆癸巳詔曰自今軍事若皆中覆不無留滯應此路事務申都統司餘皆取決樞密院契丹九斤聚黨與中府作亂擒之九斤自殺命習古乃婆盧火監護長勝軍及燕京豪族工匠由松亭關徙之內地己亥次儒州幹魯宗望等襲遼權六院司喝离質於白水梁獲之其宗屬秦王許王等十五人降聞遼主畱輜重青塚以兵萬人往應州遣照里背答宗望婁室銀木哥等追襲之宗望追及遼主決戰大敗之獲其子趙王習泥烈及傳國璽五月甲寅南京留守張覺據城叛丙寅次野狐嶺己巳次落黎溪幹魯等以趙王習泥烈林牙大石駙馬乳奴等來獻井上所獲國璽宗雋以所俘遼主子秦王許王女奧野等來見奚路都統撻懶攻速古噉里鐵尼所部十三嚴皆平之又遣奚馬和尚攻下品達魯古并五院司諸部執其節度乙列回离保爲其下所殺辛巳詔諭南京官民六月壬午朔次鴛鴦溪是日聞母敗張覺於營州丙申上不豫將還上京命移賚勃極烈宗翰爲都統吳勃極烈昱迭勃極烈幹魯副之駐兵雲中以備邊己酉次幹獨山驛召諸班勃極烈吳乞買七月辛酉次牛山宗翰還軍中八月辛巳朔日有食之乙未次渾

河北諸班勃極烈吳乞買率宗室百官上謁戊申上崩於部堵溪西行宮年五十六九月癸丑梓宮至上京乙卯葬宮城西南寧神殿丙辰諸班勃極烈即皇帝位天會三年三月上尊諡曰武元皇帝廟號太祖立原廟於西京天會十三年二月辛酉改葬和陵立開天啓祚睿德神功之碑於燕京城南嘗所駐蹕之地皇統四年改和陵曰睿陵五年十月增諡應乾典運昭德定功睿神莊孝仁明大聖武元皇帝眞元三年十一月改葬於大房山仍號睿陵

贊曰太祖英謨睿略豁達大度知人善任人樂爲用世祖陰有取遼之志是以兄弟相授傳及康宗遂及太祖臨終以太祖屬穆宗其素志蓋如是也初定東京即除去遼法減省租稅用本國制度遼主播越宋納歲幣以幽薊武朔等州與宋而置南京於平州宋人終不能守燕代卒之遼主見復宋主被執雖功成於天會間而規模運爲實自此始金有天下百十有九年太祖數年之間算無遺策兵無留行底定大業傳之子孫嗚呼雄哉

太宗本紀

按金史太宗本紀太宗體元應運世德昭功哲惠仁聖文烈皇帝諱晟本諱吳乞買世祖第四子母曰翼簡皇后挈懶氏太祖母弟也遼太康元年乙卯歲生初爲穆宗養子收國元年十月命爲諸班勃極烈太祖征伐常居守天輔五年賜詔曰汝惟朕之母弟義均一體是用汝貳我國政凡事違者閱實其罪從宜處之其餘事無大小一依本朝舊制天輔七年六月太祖次駕驚濤有疾至幹獨山驛召赴行在詔曰

今遼主盡喪其師奔於夏國遼官特列遙設等刼其子雅里而立之已留宗翰等措畫服親巡已久功亦大就所獲州部政須緩撫是用還都八月中旬可至春州汝率內戚迎我若至豹子崖尤善八月乙未會於渾河北戊申太祖崩九月乙卯葬太祖於宮城西國論勃極烈果耶王昂宗峻宗幹率宗親百官請正帝位不許固請亦不許宗幹率諸弟以赭袍被體眞璽懷中丙辰即皇帝位己未告祀天地丙寅大赦中外改天輔七年爲天會元年癸酉發春州粟賑降人之徙於上京者戊寅詔諸猛安賦米給戶口在內地匱乏者南路軍帥闍母敗張覺於樓峰口十月壬辰詔以空名宣頭百道給西南西北兩路都統宗翰曰今寄爾以方面如當遷授必待奏請恐致稽遲其以便宜從事己亥上京慶元寺僧獻佛骨却之闍母及張覺戰於兔耳山闍母敗績十一月壬子命宗望問闍母罪以其兵討張覺壬戌復以空名宣頭及銀牌給上京路軍帥實古迺婆盧火等癸亥宗望以闍母軍發廣寧下瀕海諸郡縣詔諭南京割武朔二州入於宋婁室破朔州西山擒其帥趙公直勃堇幹魯別及勃刺速被走乙室白荅於歸化己巳徙遷潤來隰四州之民於瀋州庚午宗望及張覺戰於南京東大敗之張覺奔宋城中人執其父及二子以獻戮之軍中壬申張忠嗣張敦固以南京降遣使與張敦固入諭城中復殺其使者以叛己卯詔女直人先有附於遼今復擄獲者悉從其所欲居而復之其奴婢部曲皆雖逃背今能復歸者並聽爲民十二月辛巳蠲民間貸息詔以咸州以南蘇復州以北年穀不登其應

輸南京軍糧免之甲午詔曰比聞民間乏食至有鬻其子者其聽以丁力等者贖之是日以國論勃極烈果爲諸班勃極烈宗幹爲國論勃極烈遣勃堇李靖如宋告哀

二年春正月庚戌朔以謾都訶爲阿捨勃極烈參議國政壬子命賞宗望及將士克南京之功赦闍母罪甲寅以空名宣頭五十銀牌十給宗望戊午詔字董完顏阿實賚曰先帝以同姓之人有自鬻及典質其身者命官爲贖今聞尚有未復者其悉開贖之癸亥以東京比歲不登詔減田租市租之半甲戌西南西北兩路都統宗翰宗望請勿割山西郡縣與宋上曰是遼先帝之命也其速與之夏國奉表稱藩以下寨以北陰山以南乙室耶刺部吐祿漢西之地與之丙子貽宋書索俘擄叛亡丁丑始自京師至南京每五十里置驛二月詔有盜發遼諸陵者罪死庚寅詔命給宗翰馬七百匹田種千石米七千石以賑新附之民丁酉命徙移懶路都李董完顏忠干蘇灝水乙巳詔諭南京官僚小大之事必關白軍帥無得專達朝廷丙午宗翰乞濟師詔有司選精兵五千給之丁未命宗望凡南京留守及諸關員可選勳賢有人望者就注擬之具姓名官階以聞三月己酉朔命宗望以宋歲幣銀絹分賜將士之有功者庚戌叛人活字帶降詔釋之宗望請選良吏招撫遷潤來隰之民保山砦者從之己未宗望以南京反覆凡攻取之計乞與知樞密院事劉彥宗裁決之劉公胄王末福葉家駒城來降以公胄爲廣寧尹末福爲奉先軍節度使辛未夏國王李乾順遣使上誓表閏月戊寅朔賜夏國

誓詔辛巳命置驛上京春泰之間己丑烏虎里迪烈底兩部來降丙午既許割山西諸鎮與宋以宗翰言罷之是月斜野襲遙輦昭古牙走之獲其妻孥羣從及豪族勃堇渾噶等破奚七巖而撫其民人四月己酉以宗翰經略西夏及破遼功賜以十馬使自擇其二餘以分諸帥賑上京路西北路降者及新徙嶺東之人戊午以實古迺所築上京新城名會平州乙亥詔贖上京路新遷寧江州戶口賣身者六百餘人宋遣使來弔喪以高木僕古等充遺留國信使高輿輔劉典嗣等充告即位國信使如宋五月丁丑朔上京軍帥實古迺以所獲印綬二十二及銀牌來上癸未詔曰新降之民訴訟者衆今方農時或失田業可俟農隙聽決丁亥婆速路猛安僕盧古以賊罷以謀克習泥烈代之乙巳曷懶路軍帥完顏忽剌古等言往者歲捕海狗海東青鴉鵲於高麗之境近以二舟往彼乃以戰艦十四要而擊之盡殺二舟之人奪其兵仗上曰以小故起戰爭甚非所宜今後非奉命毋輒往闡母克南京殺都統張敦固七月壬午皇子宗峻薨丙戌禁外方使介冗從多者壬辰鶻實答言高麗納吾叛亡增其邊備必有異圖詔曰納我叛亡而弗歸其曲在彼凡有通問毋違常式或來侵略整爾行列與之從事敢先犯彼雖捷必罰乙未以烏虎部及諸營叛以戾勃極烈昱等討平之八月乙巳朔以孛堇烏爪乃等爲賀宋生辰使丁巳撤離改部猛安雖思以賊罷以奚金家奴代之六部都統撻懶擊走昭古牙殺其隊將曷魯燥白撒曷等又被降駱馳山金源典中諸軍詔增給銀牌十月甲辰朔夏國遣使

謝誓詔戊午天清節宋夏遣使來賀甲子詔發寧江州粟賑泰州民被秋潦者遙輦昭古牙率衆來降典中府降丙寅詔有司運米五萬石於廣寧以給南京潤州戌卒命南路軍帥闡母以甲士千人益合蘇館路孛堇完顏阿實賚以備高麗戊辰西南西北兩路權都統幹魯言遠詳穩撻不野來奔言耶律大石自稱爲王置南北官屬有戰馬萬匹遼主從者不過四千戶有步騎萬餘欲越天德駐余觀谷詔曰追襲遼主必酌事宜其討大石則俟報下十一月癸未闡母下宜州拔叔牙山殺節度使韓慶民癸卯詔以米五萬石給撻懶實古迺十二月戊申以孛堇高居慶等爲賀宋正旦使三年正月癸酉朔宋夏遣使來賀戊子同知宣徽院事韓資政加尚書左僕射爲諸宮都部署乙未夏國遣使奠幣及賀即位宋遣使賀即位二月壬戌婁室獲遼主於余覲谷丁卯以龐葛城地分授所徙烏虎里迪烈二部及契丹民三月乙亥阿捨勃極烈護都訶薨丙子賑奚契丹新附之民辛巳建乾元殿幹魯獻傳國寶以謀葛失來附請授印綬是日賜完顏婁室鐵券四月壬寅朔詔以遼主赴京師丁巳南路軍帥察刺以罪罷五月己丑蕭人斤獲遼主寶來獻六月庚申以獲遼主遣李用和等充告慶使如宋七月壬申禁內外官宗室母私役百姓己卯南京帥以錦州野蠶成質奉其絲綿來獻命賞其長吏詔權勢之家母買貧民爲奴其買者一人償十五人詐買者一人償二人皆杖一百甲申詔南京括官豪牧馬以等第取之分給諸軍以耶律固等爲宋報謝使八月

癸卯幹魯以遼主至京師甲辰告於太祖廟丙午遼主延禧入見降封海濱王壬子詔有司揀閱善射勇健之士以備宋九月壬午廣寧府獻嘉禾癸巳保州路都孛堇加古撒曷有罪伏誅以孛堇徒單烏烈代之十月甲辰詔諸將伐宋以諸班勃極烈杲領都元帥移實勃極烈宗翰兼左副元帥先鋒經略使完顏希尹爲元帥右監軍左金吾上將軍耶律余睹爲元帥右都監自西京入太原六部路軍帥撻懶爲六部路都統斜也副之宗望爲南京路都統闡母副之知樞密院事劉彥宗兼領漢軍都統自南京入燕山詔建太祖廟於西京召耶魯赴京師教授女直字戊申有司言權南路軍帥鶻實答官吏貪縱詔鞠之壬子天清節宋夏遣使來賀丁巳以闡母爲南京路都統掃喝副之宗望爲闡母劉彥宗兩軍監戰壬戌詔曰今大有年無儲蓄則何以備饑饉其令牛一具賦粟一石每謀克爲一廩貯之宋易州戌將韓民毅以軍降處之蔚州十一月庚辰以降封遼主爲海濱王詔中外辛卯南路軍帥司請禁契丹奚漢人挾兵器詔勿禁以張忠嗣權簽南京中書樞密院事十二月庚子宗翰下朔州甲辰宗望諸軍及宋郭藥師張企徽劉舜仁戰於白河大破之蒲覓敗宋兵於古北口丙午郭藥師降燕山州縣悉平戊申宗翰克代州乙卯中山降丙辰宗望破宋兵五千於真定戊午宗翰圍太原耶律余睹破宋河東陝西援兵於汾河北甲子宗望克信德府四年春正月丁卯朔始朝日降臣郭藥師董才皆賜姓完顏氏戊辰宗弼取湯陰大吳攻下澤州迪古補

取黎陽己巳諸軍渡河庚午取滑州宗望使吳孝民等入汴問宋取首謀平山童貫譚稹詹度及張覺等宋太上皇帝出奔癸酉諸軍圍汴甲戌宋使李悅來謝罪且請修好宗望許宋修好約質割三鎮地增歲幣載書稱伯姪戊寅宋以康王構少宰張邦昌為質辛巳宋上誓書地圖稱姪大宋皇帝伯大金皇帝癸未諸軍解圍二月丁酉朔夜宋將姚平仲兵四十萬來襲宗望營敗之己亥復進師圍汴宋使宇文虛中以書來改以肅王樞為質遣康王構歸師還壬子以滑潞二州與宋宗翰定威勝軍攻下隆德府丁巳大澤州海濱王家奴誣其主欲亡去詔誅其首惡餘並杖之三月癸未銀木可圍太原宗翰還西京四月癸卯宗望使宗弼來奏捷乙丑耿守忠等大敗宋人於西都谷五月辛未宋种師中以兵出井陘癸酉完顏活女敗之於殺熊嶺斬師中於陣是日拔萬速敗宋姚古軍於隆州谷六月丙申朔高麗國王王楷奉表稱藩庚戌宗望獻所獲三象庚申以宗望為右副元帥七月丙寅遣高伯淑等宣諭高麗壬申出金牌命字董大臬以所領渤海軍八猛安為萬戶戊子以鐵勒部長奪萬刺不從其兄夔里本叛賜馬十一豕百錢五百萬蕭仲恭使宋還以所持宋帝與耶律余睹蠟書自陳八月庚子詔左副元帥宗翰右副元帥宗望伐宋張灝率兵出汾州拔萬速擊走之劉臻以兵出壽陽婁室破之庚戌宗翰伐西京辛亥婁室等破宋張灝軍於文水癸丑宗望發保州是日耶律鐸破宋兵於雄州那野等敗宋兵於中山甲寅新城縣進白鳥庚申突撚取新樂九月丙寅宗翰克太原執

經略使張孝純鶴沙虎取平遙靈石孝義介休諸縣己巳復以南京為平州辛未宗望破宋种師關軍於井陘取天威軍克真定殺其守李選十月婁室克汾州石州降蒲察克平定軍遼州降丁未天清節高麗夏遣使來賀中京進嘉禾十一月甲子宗翰自太原趨汴丙寅宗望自真定趨汴戊辰宗翰下威勝軍癸酉撒刺谷破天井關乙亥宗翰克隆德府活女渡盟津西京末安軍鄭州皆降庚辰宗翰克澤州宗望諸軍渡河臨河大名二縣德清軍開德府皆下丙戌克懷州是日宗望至汴閏月壬辰朔宋出兵拒戰宗望等擊敗之癸巳宗翰至汴丙辰克汴城庚申以高麗充高麗生日使辛酉宋主桓出居青城十二月癸亥宋主桓降是日歸於汴城庚辰詔曰朕惟國家四境雖遠而兵革未息田野雖廣而畎畝未闢百工略備而祿秩未均方宜僅修而賓館未贍是皆出乎民力苟不務本業而抑游手欲上下皆足其可得乎其令所在長吏敦勸農功

五年正月辛卯朔高麗王遣使來賀癸巳宗翰宗望使使以宋降表來上乙未知樞密院事劉彥宗上表請復立趙氏不聽丁巳回鶻喝里可汗遣使入貢二月丙寅詔降宋二帝為庶人三月丁酉立宋少宰張邦昌為大楚皇帝割地賜夏國四月乙酉克陝府取虢州丙戌以六部路都統撻懶為元帥左監軍南京路都統闞母為元帥左都監宗翰宗望以宋二帝歸己丑詔曰合蘇館諸部與新附人民其在降附之後同姓為婚者離之五月庚寅朔宋康王構即位於歸德宋殺張邦昌婁室降解絳慈隰石河中崑崙寧化保德火山諸城撻懶徇地山東下密州迪虎下單州廣信軍降六月庚申詔曰自河之北今既分畫重念其民或見城邑有被殘者不無疑懼遂命堅守若即討伐生靈可恐其申論以理招輯安全之儼執不移自當致討若諸軍敢利於俘掠輒肆蕩毀者底於罰庚辰右副元帥宗望薨漢國王宗傑繼薨七月甲午賜宗翰券書除反逆外咸貴勿論以石州戊將烏虎棄城喪師杖之削其官八月戊寅以宋捷遣耶律居謹等充宣慶使使高麗丙戌以宗輔為右副元帥詔曰河北河東郡縣職員多闕宜開貢舉取士以安新民其南北進士各以所業試之九月丁未詔曰內地諸路每耕牛一具賦粟五斗以備歉歲辛亥賜元帥右監軍完顏希尹萬戶銀術可券書除赦所不原餘並勿論闞母取河間大敗宋兵於莫州雄州降撻懶克祁州宋寧軍保州順安軍皆降冬十月丁卯沙州回鶻活刺散可汗遣使入貢辛未天清節高麗夏遣使來賀宋二帝自燕徙居於中京十二月丙寅右副元帥宗輔伐宋徇地淄青烏林荅泰欲敗宋將李成於淄州趙州降阿里刮徇地洛州敗敵兵遂取滑州乙亥西南路都統幹魯薨己卯賽里下汝州

六年正月丙戌朔高麗夏遣使來賀宗弼破宋鄭宗孟軍於青州銀木可取鄧州薩謀魯入襄陽拔萬速入均州馬五取房州癸巳克青州癸卯闞母克濰州丁未迪古補敗宋將趙子昉兵撒萬喝敗宋兵於河上甲寅宋將馬括兵次樂安宗輔擊敗之聞宋主在維揚以農時還師宗弼敗宋兵於河上二月乙卯朔拔萬速取唐州癸亥取蔡州己巳移刺古敗宋將臺

宗雋等兵於大名庚午再破其軍獲臺宗雋及宋忠
甲戌拔離速取陳州癸未克穎昌府鄭州叛入於宋
復取鄭州遷洛陽襄陽穎昌汝鄭均房唐鄧陳蔡之
民於河北宗翰復遣婁室攻下同華京兆鳳翔擒宋
經制使傅亮阿鄰破河中幹魯入馮翊三月壬辰命
南路軍帥實古迺籍節度使完顏慎思所領諸部及
未置猛安謀克戶來上己酉捷懶下恩州五月戊戌
移沙土古思以本部來附六月己未詔求祖宗遺事
捷懶遣兵徇下磁州信德府真定賊自稱元帥秦王
撒離喝討平之七月乙巳宋主遣使奉表請和詔進
兵伐之以宋二庶人赴上京八月乙卯婁室敗宋兵
於華州詔特刺破敵於渭水遂取下邽丁丑以宋二
庶人素服見太祖廟遂入見於乾元殿封其父昏德
公子重昏侯是日告於太祖廟以州郡職員名稱及
俸給因革詔中外九月辛丑繩果等敗宋兵於蒲城
甲辰又破敵於同州乙丑取丹州十月丙寅天清節
高麗夏遣使來賀癸酉知樞密院事劉彥宗薨丁丑
蒲察婁室敗宋兵於臨真戊寅徙昏德公重昏侯於
韓州庚辰宗翰宗輔會於濮伐宋十一月庚寅蒲察
婁室取延安府壬辰賑移懶路乙未取濮州綏德軍
降婁室再攻晉寧軍其守徐徽言固守不能克十二
月丙辰宗弼取開德府丁卯宗輔克大名府鶴沙虎
敗宋兵於鞏

其守徐徽言據子城拒戰庚午率眾潰圍走擒之使
之拜不拜臨之以兵不動命降將折可求諭之降指
可求大罵出不遜語遂殺之其統制孫昂及士卒皆
不屈盡殺之甲戌詔禁醫巫問山遼代山陵樵採三
月己卯朔日中有黑子壬寅詔軍興以來良人被略
為驅者聽其父母夫妻子贖之尚書左僕射高真罷
四月蒲察婁室取鄭坊二州五月乙卯拔離速等襲
宋主於揚州九月丙午朔日有食之庚午宗弼敗宋
兵於睢陽辛未降其城是月曹州降十月丙子朔京
兆府降丁丑鞏州降庚寅天清節高麗夏遣使來賀
丁酉阿里當海大臭破敵於壽春己亥安撫使馬世
元以城降甲辰廬州降十一月庚戌徙曷蘇館都統
司治寧州乙卯高麗遣使來賀丙辰宗弼取和州壬
戌宗弼渡江敗宋副元帥杜充軍於江寧丁卯守臣
陳邦光以城降十二月丙戌宗弼取湖州丁亥克杭
州阿里蒲盧渾追宋主於明州越州降大臭敗宋樞
密使周望於秀州又敗宋兵於杭州東北戊戌阿里
蒲盧渾敗宋兵於東關遂濟曹娥江壬寅敗宋兵於
高橋宋主入於海

之諸軍渡江是日阿魯補戰於拓卑己亥周企戰於
壽春辛丑婁室戰於淳化皆勝之醴州降遂克邠州
五月癸卯禁私度僧尼及繼父繼母之男女無相嫁
娶戊申詔曰河北河東僉軍其家屬流寓河南被俘
掠為奴婢者官為贖之俾復其業六月壬申詔遣遼
統軍使耶律曷禮質節度使蕭別離刺等十人分治
新附州鎮癸酉詔以昏德公六女為宗婦七月辛亥
詔給泰州都統婆盧火所部諸謀克甲冑各五十先
遣婁室經略陝西所下城邑叛服不常其監戰阿盧
補請益兵帥府會諸將議曰兵威非不足綏懷之道
有所未盡誠得位望隆重恩威兼濟者以往可指日
而定若以皇子右副元帥宗輔往為宜以聞詔曰婁
室往者所向輒克今使專征陝西淹延未定豈倦于
兵而自愛耶關陝重地卿等其戮力焉丁卯上如東
京溫湯徙昏德公重昏侯于鶴里改路九月戊申立
劉豫為大齊皇帝世修子禮都大名府辛酉諸班勃
極烈都元帥吳玠癸亥宗輔等敗宋張浚軍於富平
耀州降乙丑鳳翔府降十月乙亥上至自東京齊帝
劉豫遣使謝封冊甲申天清節齊高麗夏遣使來賀
以鐵驪突离刺同中書門下平章事詔遼宋官上本
國詰命等第換授十一月甲辰宗輔下涇州丁未渭
州降敗宋劉侃軍于瓦亭戊申原州降宋涇原路統
制張中孚知鎮軍事李彥琦以衆降馬五等擊宋吳
玠軍於隴州庚戌以遙鎮節度使烏克壽等為齊劉
豫生日使癸亥宗輔以陝西事狀聞詔獎諭之十二
月丁丑完顏婁室薨乙酉宗輔敗宋劉維輔軍壬辰
熙州降九年正月己亥朔齊高麗夏遣使來賀戊申

命以徒門水以西渾曠星顯僞蠶三水以北開田給
曷懶路諸謀克辛亥蒲察鴛拔魯完顏忒里討張萬
敵於白馬湖陷於敵癸丑以同中書門下平章事時
立愛爲侍中知樞密院張忠嗣爲宣政殿大學士知
三司使事宗弼阿盧補撫定鞏洮河樂西寧蘭廓積
石等州涇原熙河兩路皆平四月己卯詔新徙戍邊
戶匱於衣食有典質其親屬奴婢者官爲贖之戶計
其口而有二三以官奴婢益之使戶爲四口又乏
耕牛者給以官牛別委官勸督田作戍戶及邊軍資
糧不繼糴粟於民而與賑恤其續遷戍戶在中路者
姑止之卽其地種藝俟畢穫而行及來春農時以至
戍所五月丙午分遣使者諸路勸農六月壬辰賜昏
德公重昏侯時服各兩襲八月辛巳回鶻限欲遣使
來貢九月己酉和州回鶻執耶律大石之黨撒八迪
里突迭來獻十月戊寅天清節齊高麗夏遣使來賀
撒離喝攻下慶陽慕洧以環州降宗弼與宋吳玠戰
于和尚原敗績十一月己未遷趙氏疎族於上京以
陝西地賜齊

十年正月癸巳朔齊高麗夏遣使來賀己酉齊表謝
賜地壬子詔曰昔遼人分士庶之族賦役皆有等差
其悉均之二月庚午賑上京路戍邊猛安民四月丁
卯詔諸良人知情嫁奴者聽如故爲妻其不知而嫁
者去住悉從所欲移賚勃極烈左副元帥宗翰朝京
師庚午以太祖孫亶爲諸班勃極烈皇子宗磐爲國
論忽魯勃極烈國論勃極烈宗幹爲國論左勃極烈
移賚勃極烈左副元帥宗幹爲國論右勃極烈兼都
元帥右副元帥宗輔爲左副元帥庚寅聞鴨綠混同

江暴漲命賑徙戍邊戶在混同江者閏月辛卯詔分
遣鴛沙虎等十二人閱諸路丁壯調赴軍七月甲午
賑泰州路戍邊戶上如中京九月元帥右都監耶律
余睹謀反出奔其黨燕京統軍使蕭高六伏誅蔚州
節度使蕭特謀葛自殺十月壬寅天清節大赦齊高
麗夏遣使來賀上如典中府齊使使來告母喪十一
月癸亥以武良謀爲齊弔祭使癸未撒離喝請取劍
外十三州從之部族節度使使古斯捕斬余睹及其
諸子函其首來獻十二月庚子撒離喝克金州上至
自典中府

十一年正月丁巳朔齊高麗夏遣使來賀丁卯撒離
喝敗吳玠於饒峰關戊辰取洋州甲戌入興元府二
月乙亥元帥府言承詔賑軍士臣恐有司錢幣將不
繼請自元帥以下有祿者出錢助給之詔曰官有府
庫而取於臣下此何理耶其悉從官給八月甲申黃
龍府置錢帛司戊子趙樛誣告其父昏德公謀反樛
及其壻劉文彥伏誅戊戌詔曰比以軍旅未定常命
帥府自擇人授官今並從朝廷選注十月丙申天清
節齊高麗夏遣使來賀十一月丙寅賑移懶路宗弼
克和尚原十二月癸未振曷懶路

十二年正月辛亥朔齊高麗夏遣使來賀甲子初改
定制度詔中外丙寅如東京二月丁酉撒離喝敗宋
吳玠軍於固鎮四月至自東京六月甲午以阿盧補
爲元帥右都監十月庚寅天清節齊高麗夏遣使來
賀

十三年正月丙午朔日有食之己巳上崩於明德宮
年六十一庚午諸班勃極烈即皇帝位於柩前三月

庚辰上尊諡曰文烈皇帝廟號太宗乙酉葬和陵皇
統四年改號恭陵五年增上尊諡曰體元應運世德
昭功哲惠仁聖文烈皇帝貞元三年十一月戊申改
葬於大房山仍號恭陵
贊曰天輔草創未遑禮樂之事太宗以斜也宗幹知
國政以宗翰宗望總戎事既滅遼舉宋即議禮制度
治曆明時續以武功述以文事經國規模至是始定
在位十三年宮室苑囿無所增益未聽大臣計傳位
熙宗使太祖世嗣不失正緒可謂行其所甚難矣